

मार्निंग डोगरी न्यूज बुलेटिन, समें. 09.20 Hrs

<><><><><><>

Headlines

1. उपराश्ट्रपति जगदीप धनखड़ होरें सेहत कारणें करी अपने औहदे थवां इस्तीफा दिता।
2. सेहत मंत्री सकीना इतू होरें आखेआ जे औने आहली पीढ़िं लेई जम्मू-कश्मीर गी नशामुक्त बनाना अत लाजमी ऐ।
3. मुख सचिव अटल डुल्लू होरें आखेआ जे भारत नेट प्रोग्राम दी नमें सिरेआ अमलावरी जमीनी सतह पर ई-गवर्नेंस गी लागू करने लेई अहम।
4. जम्मू दे भगवती नगर आहले आधार शिविर थवां 3500 थवां बद्द श्रद्धालु श्री अमरनाथ जी दी जातरा लेई घाटी आस्ते रवाना।
5. राती थवां होआ'रदी बरखा करी आम जनजीवन प्रभावित, मौसम विभाग नै 24 जुलाई तगर कई सारी थाहरें पर भारी बरखा दी पेशनगोई कीती ऐ।

<><><><><><>

V.P Resigns

उपराश्ट्रपति जगदीप धनखड़ होरें स्वास्थ कारणें दे चलदे इस्तीफा दिता ऐ। राश्ट्रपति द्रोपदी मुर्मू होरें'गी लिखी दी चिट्ठी च धनखड़ होरें गलाया जे स्वास्थ सेवा गी प्राथमिकता देने ते मेडिकल सलाह दी पालमा करने लेई उनें फौरी तौरा पर भारत दे उपराश्ट्रपति पद शा इस्तीफा देई दिता ऐ। उनें अपने कार्यकाल दरान राश्ट्रपति हुंदे अटूट सहयोग लेई उंदा आभार जताया।

धनखड़ होरें प्रधानमंत्री नरेंद्र मोदी ते उन्दे मंत्री परिषद दे प्रति बी अपना आभार प्रगट कीता।
उनें गलाया जे सब्बने सांसदेन शा उनेंगी जेड़ी गर्मजोशी, विश्वास ते प्यार मिलेआ ऐ, ओह उन्दे
चेते च म्हेशां रौहग। धनखड़ होरें आखेआ जे इस महान लोकतंत्र च उपराष्ट्रपति दे रूप च
हासल अनुभवें लेई ओह बड़े मते आभारी न।

<><><><><><>

Health-Minister

सेहत मंत्री सकीना इतू होरें इस गल्ला पर जोर दिता ऐ जे धार्मिक नेताएं, सरकारी मलाजमें,
कनून नाफिज करोआने आहली एजेंसिएं, समुदाय दे सरबन्धी धड़ें ते नागरिकें दे सांझे जत्नें
कन्नै समाज थवां नशे दी माड़ी कवैतू गी खत्म कीता जाई सकदा ऐ। एह गल्ल मंत्री होरें
श्रीनगर दे इक सरकारी कॉलेज च आयोजित इक रोजा सेमीनार गी संबोधित करदे होई
आकखी। अपने संबोधन च सकीना होरें इस गल्ला पर जोर पाया जे समाज दा हर व्यक्ति
युवाएं च बददी इस माड़ी कवैतू गी खत्म करने च महत्वै आहली भूमिका निभाई सकदा ऐ।
मंत्री होरें आखेआ जे सरकार इक्कली इस कवैतू खलाफ लड़ाई नेई लड़ी सकदी। उनें आखेआ।

<><><><><><>

CS-ABP

जम्मू-कश्मीर च भारत नेट प्रोग्राम दी नमें सिरेआ अमलावरी यकीनी करने लेई मुख सचिव
अटल डुल्लू ते टेलीकॉम दे सचिव नीरज मित्तल होरें इक बैठक दी सहअध्यक्षता कीती। बैठक
दा मकसद इंटरनेट जां फी तकनीकी तौरा पर पिछे रेही गेदे ग्रामीण इलाकें गी एहदे कन्नै
जोड़िये बित्थ गी पूरना ऐ की जे शैहरा च ब्राडबैंड ते इंटरनेट आहली सुविधाएं दी उपलब्धता

33 फीसद तगर ऐ जेदे मुकाबले ग्रामीण इलाकें च एह आंकड़ा छड़ा 2 फीसद ऐ। इस्सै कमी गी पूरा करने लेई मुख सचिव होरें इस प्रोग्राम दी महत्ता पर लो पाई। उनें इस प्रोग्राम दी समेंसिर अमलावरी यकीनी बनाने लेई प्रशासन दी तरफा पूरा-पूरा सहयोग देने दा भरोसा दोआया।

<><><><><><>

CS-JKCIP

मुख सचिव अटल डुल्लू होरें कल श्रीनगर च राई-बाई ते ओहदे कन्नै जुड़े दे क्षेत्रें सरबंधी जेकेसीआईपी स्कीम दी अमलावरी दी समीक्षा करने लेई बैठक दी अध्यक्षता कीती। राई-बाई मैहकमे आसेआ आयोजित इस स्कीम दा मकसद ऐ प्रदेश दे करसानें दी भलाई-बेहतरी यकीनी करना। बैठक च भविष्य लेई रणनीति तैयार करने, सालाना कम्मकाज ते वितीय पैहलू पर ध्यान केंद्रित कीता गेआ। बैठक दरान मुख सचिव होरें सब्बै लक्ष्यें गी मिथे गेदे समें दे अंदर-अंदर सबूरा करने पर जोर पाया ते कन्नै गै एहदी असरदार अमलावरी यकीनी करने पर बल बल दिता।

<><><><><><>

Sericulture-Deptt.

रामबन जिले च रेशम दे कीड़े पालने सरबंधी मैहकमे आसेआ करसानें ते खास करियै महिलाएं गी सशक्त बनाने दे मकसद कन्नै लगातार कम्म कीता जारदा ऐ। मैहकमे आसेआ शहतूत दी नर्सरी जित्थे तूत दे बूटे लाए गेदे न, लगातार निरीक्षण कीता जारदा ऐ तां जे उनेंगी बेहतर

तरीके कन्नै एहदे कन्नै मतल्लक कम्मै-काजै च शामिल कीता जाई सकै। सक्रिय रूप कन्नै कम्म करदे होई मैहकमे आसेआ उनेंगी जरूरी मदाद ते तकनीकी मार्गदर्शन उपलब्ध करोआया जायदा ऐ तां जे उन्दे लेई औंदन दे नमें मौके उपलब्ध करोआई जाई सकन। इस बारे आकाशवाणी समाचार कन्नै गल्ल करदे होई रामबन दे जिला सेरीकल्चर अधिकारी संजय रोमित्रा होरें आखेआ।

<><><><><><>

Amarnath-Yatra

जम्मू दे भगवती नगर आहले आधार शिविर थवां 3 जहार 536 श्रद्धालुएं दा 20मां जत्था सख्त सुरक्षा बंदोबस्ते हेठ श्री अमरनाथ जी दी जातरा लेई घाटी आस्तै रवाना होआ। एह श्रद्धालु 132 गड्डिएं दे काफले च सोआर होइयै अगड़ी जातरा लेई रवाना होए। इन्दे च 2 जहार 601 मर्द, 822 महिलां, 11 बच्चे, 86 साधु ते 16 साध्वियां शामिल हियां। इन्दे चा इक जहार 250 श्रद्धालु बालटाल लेई ते 2 जहार 286 पहलगाम लेई रवाना होए। इस मौके पर श्रद्धालुएं च बड़ा मता जोश दिखने गी लब्बा।

<><><><><><>

Tawi-Aarti

कल संझा भारी बरखा दे बावजूद बड़ी बद्द गिनतरी च लोक सूर्य पुत्री तवी घाट च रोजाना होने आहली तवी आरती लेई किट्ठै होए। इस मौके पर लोकें दीए बालिए मंत्रें दा उच्चारण करदे होई तवी दे कंडे बड़े उत्साह कन्नै तवी आरती च हिस्सा लैता। उन्दे जोश च कोई कमी

नेई ही। श्री अमरनाथ जी दी जातरा दे शुरू होने पर तवी आरती गी शुरू कीता गेआ जेड़ी रोजाना सूर्य पुत्री देवी घाट पर संझा लै आयोजित कीती जंदी ऐ। तवी आरती च शामिल लोकें अपने विचार इस चाल्ली सांझे कीते।

<><><><><><>

CBSE-CCTU

विद्यार्थियों दी सुरक्षा गी होर बेहतर करने दे मकसद कन्नै केंद्री माध्यमिक शिक्षा बोर्ड सीबीएसई नै अपने सब्बनै स्कूले च सीसीटीवी कैमरे लाने दे निर्देश दिते न जेड़े सुनने ते दिक्खी सकने आहली रिकार्डिंग करने च सक्षम होन। नमें दिशा-निर्देशें मूजब कैमरे अंदर औने ते बाहर जाने आहली थाहरें, कोआर्डिनेटर, पोड़ियें, कक्षाएं, लैब, लाइब्ररी, कैंटीनां, खेड्ढ मैदान ते होरनै थाहरें पर लाना अत्त लाजमी होग। एह सीसीटीवी कैमरे रियल ट्यून् रिकार्डिंग करने आहले होने चाहिदे न ते घट्टोघट्ट पिछले 15 दिनें दी रिकार्डिंग बैकअप दे तौरा पर रखना लाजमी होग। कल जारी इक अधिसूचना च सीबीएससी नै Affiliation bye laws-2018 च संशोधन दी घोषणा कीती।

<><><><><><>

IGNOW

गुणवत्ता आहली उच्च शिक्षा दी उपलब्धता गी बेहतर बनाने दी दिशा च इक महत्वपूर्ण गैह् पुट्टदे होई उच्च शिक्षा दे अतिरिक्त मुख सचिव शांतमनु होरें कल गौरमेंट जीजीएम साइंस कालेज जम्मू च इग्नो लर्नर सुपपोर्ट सेंटर दा उद्घाटन कीता। एहदे शा पैहले इग्नो दे वाइस

चांसलर प्रो. उमा कांजीलाल हुंदी मंजूरी कन्नै ते विद्यर्थी सहायता केंद्र दी उपसमिति दी सिफारिशें दे आधार पर जीजीएम साइंस कालेज जम्मू च बी.एस.सी ते एम.एस.सी जालोजी लेई सूचित कीता गेआ।

<><><><><><>

Weather

जम्मू दे डिप्टी कमिशनर सचिन कुमार वैश्या होरें जिले च टी.बी. मुक्त भारत अभियान दी अमलावरी दा जायजा लैता। उनें मुतल्लका अफसरें गी आखेआ जे ओह जांच ते इलाज आहली कारवाई गी तेज करन ते मुख करी ध्यान उनें लोकें पर देन जेड़े एहदी तौले चपेट च आई सकदे न जियां वरिष्ठ नागरिक। शराब ते तम्बाकू दा सेवन करने आहले, एच.आ.ई.वी पाजिटिव व्यक्ति, मधुमेह दे मरीज ते समाजी तौर पर पछड़े दे लोक, डिप्टी कमिशनर होरें संदिग्ध मामले दी ताल ते उन्दे तौले इलाज पर बल दितता। उनें सब्बनें बशकार तालमेल खास करी समाज कल्याण ते ग्रामीण विकास मैहकमें बशकार आपसी तालमेल पर जोर पाया तां जे लोकें च बेहतर ढंगे सिर जागरूकता पैदा कीती जाई सकै।

<><><><><><>

Weather

हून जानकारी मौसम बारे। जम्मू खिते च कल रातीं थमां होआ'रदी लगातार बरखा कारण आम जन-जीवन पर असर पेआ। केई सारी थाहरें पर पानी किट्ठा होई गेदा ऐ जेदे करी लोकें गी परेशानी दा सामना करना पवा'रदा ऐ। तोआई, मदाना च ल्हास-पस्सी पौने करी जम्मू-पुंछ रोड

गड्डियें दी आओजाई लेई बंद करी दिता गेदा ऐ। मौसम विभाग नै 24 जुलाई तगर मती सारी
थाहरें पर गरज-चमक कन्नै भारी बरखें दी पेशनगोई कीती दी ऐ। लोकें गी सलाह दिती गेदी ऐ
जे ओह नदियें-दरयाएं दे कंडे नेई जान।

<><><><><><>